



# ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

27.11.2017թ.

## Ո Ր Ո Շ ՈՒ Մ

**ՀՀ գնումների բողոքարկման խորհրդի**

**թիվ ՍՑ-ԱՄ-2017/72**

ՀՀ գնումների բողոքարկման խորհուրդը (այսուհետ՝ խորհուրդ) ուսումնասիրելով ՀՀ ֆինանսների նախարարության 02.11.2017թ. թիվ 03/26-3/19942-17 գրությամբ «Էքսպորտ օյլ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով ներկայացված հիմքերը, պարզեց հետևյալը.

### **1. ՀՀ ֆինանսների նախարարության ներկայացրած փաստերը և պահանջը**

ՀՀ ֆինանսների նախարարությունը, ՀՀ արդարադատության նախարարության քրեակատարողական վարչության (այսուհետ՝ Պատվիրատու) 31.10.2017թ. թիվ 40/11-503 գրության հիման վրա, 02.11.2017թ. թիվ 03/26-3/19942-17 գրությամբ խորհրդում նախաձեռնել է «Էքսպորտ օյլ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ Ցուցակ) ներառելու պաշտոնական ընթացակարգ:

## 2. «Էքսպորտ օյլ» ՍՊԸ-ի ներկայացրած փաստաթղթերը և դիրքորոշումը

ՀՀ գնումների բողոքարկման խորհուրդը 03.11.2017թ. թիվ ԳԲԽ-ՄԱ/1/20010-17 գրությամբ կարծիք ստանալու նպատակով դիմել է «Էքսպորտ օյլ» ՍՊԸ-ին:

Ի պատասխան վերոհիշյալ գրության՝ Ընկերությունը 07.11.2017թ. գրությամբ հայտնել է, որ մասնակցել է ՀՀ արդարադատության նախարարության քրեակատարողական վարչության կողմից կազմակերպված «ՀՀ ԱՆ ՔԿՎ-ԳՀԱՊՁԲ-17/13» ծածկագրով գնանշման հարցման ընթացակարգին և հայտերի ներկայացման պահին՝ 25.09.2017թ., հարկային որևէ պարտավորություն չի ունեցել: Նշված փաստը հաստատվում է ՀՀ ԿԱ ՊԵԿ-ի կողմից տրամադրված տեղեկանքների և կից ներկայացվող հաշվետվությունների և գրությունների համեմատական վերլուծության արդյունքում: ՊԵԿ-ի կողմից տրամադրված տեղեկություններում առկա են անճշտություններ: Տեղեկանքում նշված ապառքները առաջացել են 25.09.2017թ.-ից հետո, 2017թ. հոկտեմբերի 5-ից 10-ը ընկած ժամանակահատվածում, երբ Ըկերությունը հնարավորություն է ունեցել ներկայացնել հարկային օրենսդրությամբ սահմանված հաշվետվություններ, իսկ այնուհետև անմիջապես վճարել հարկային պարտավորությունները: Ընկերությունը հայտնել է նաև, որ խնդիրը կայանում է նրանում, որ դեռևս 2017 թվականի օգոստոս ամսին Ընկերություն ԵՏՄ տարածքից ՀՀ է տեղափոխվել տեխնիկական յուղեր: Երեք ավտոմեքենաներ ՀՀ մաքսային մարմինների ապօրինի գործողությունների արդյունքում կապարակնքվել են և տեղափոխվել մաքսային տերմինալ: Շուրջ մեկ ամիս տևած գործողությունների արդյունքում Ընկերությունը հնարավորություն չի ունեցել ստանալ բեռն ուղեկցող փաստաթղթերը և ներկայացնել ղեկավար պաշտոնատար անձանց: Ընկերությունը հայտնել է, որ մինչ օրս ՊԵԿ-ից գրավոր պատասխան չի տրամադրվել:

Ընկերությունը հայտնել է նաև, որ մասնակցել է վարչական իրավախախտումների հայտնաբերման և վարչական վարույթի իրականացման վարչության կողմից իրականացվող մի քանի վարույթների, որի արդյունքում որոշում է կայացվել բեռներից վերցնել փորձանմուշներ, որից հետո բազմաթիվ բողոքների արդյունքում բեռները բաց են թողնվել:

Ընկերության կողմից ներկայացվել են ուշացված հարկային հաշվետվություններ, 2017թ.-ի օգոստոս ամսվա հաշվետու ժամանակաշրջանի վերաբերյալ, որոնք պետք է

ներկայացվեր և վճարվեր մինչև հայտ ներկայացնելու ամսաթիվը, մինչդեռ հայտ ներկայացնելու պահին Ընկերությանը հայտնի չէր բեռի կարգավիճակը, ինչ հիմքերով է պահվում և Ընկերությանը կհանձնվի թե ոչ, հետևաբար Ընկերությունը օբյեկտիվորեն հնարավորություն չի ունեցել այդ հաշվարկները սահմանված կարգով արտացոլել և ժամանակին կատարել իր հարկային պարտավորությունները:

Ընկերությունը հայտնել է, որ «Էքսպորտ օյլ» ՍՊԸ-ն հանդիսանում խոշոր հարկ վճարող, երբևէ չի ունեցել չկատարված հարկային պարտավորություններ, մշտապես ունեցել է գերավճարներ տարբեր հարկատեսակներից, իսկ ՊԵԿ-ի կողմից տրամադրված տեղեկատվությունը, որը հիմք է հանդիսացել այս պաշտոնական ընթացակարգի համար, պարզապես ոչ ճիշտ տեղեկատվություն է և արդյունք է հարկային սպասարկման կենտրոնի կողմից համապատասխան հաշվարկները և հաշվանցները անճշտություններով կատարելու:

Ամփոփելով վերոշարադրվածը, Ընկերությունը խնդրել է «Էքսպորտ օյլ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու պահանջը մերժել:

«Էքսպորտ օյլ» ՍՊԸ-ն, պատշաճ ծանուցված լինելով Խորհրդի 07.11.2017թ. ժամը 11:00-ի նիստի վերաբերյալ, ապահովել է իր ներկայացուցչի մասնակցությունը, ով պնդել է վերոհիշյալ դիրքորոշումը և հայտնել է Խորհրդին, որ նշված խնդրի հետ կապված Ընկերությունը դիմել է ՊԵԿ-ին և ակնկալում է պատասխան, որը ստանալուն պես կներկայացնի Խորհրդին:

Ընկերությունը միջնորդել է Խորհրդին հետաձգել նիստը՝ մինչ ՊԵԿ-ից պատասխանի ստացումը:

Խորհուրդը բավարարել է Ընկերության միջնորդությունը:

### **3. ՀՀ արդարադատության նախարարության քրեակատարողական վարչության կողմից ներկայացրած փաստարկները և դիրքորոշումը**

ՀՀ արդարադատության նախարարությունը քրեակատարողական վարչությունը 31.10.2017թ. թիվ 40/11-5305 գրությամբ հայտնել է, որ ՀՀ ԱՆ ՔԿ վարչության կողմից «ՀՀ

ԱՆ ՔԿՎ-ԳՀԱՊՁԲ-17/13» ծածկագրով հայտարարված գնման ընթացակարգի հայտերի բացման արդյունքում՝ սահմանված կարգով հարցում է կատարվել ՀՀ ԿԱ պետական եկամուտների կոմիտե, որտեղից ստացվել է եզրակացություն համաձայն որի «Էքսպորտ օյլ» ՍՊԸ-ն հայտը ներկայացնելու օրվա դրությամբ ՀՀ պետական բյուջեի նկատմամբ ունի ժամկետանց հարկային պարտավորություններ:

Պատվիրատուն, պատշաճ ծանուցված լինելով Խորհրդի 07.11.2017թ. ժամը 11:00-ի նիստի վերաբերյալ, չի ապահովել իր ներկայացուցչի մասնակցությունը:

#### **4. ՍՑ-ԱՄ-2017/72 պաշտոնական ընթացակարգի քննության համար էական նշանակություն ունեցող փաստերը**

ՍՑ-ԱՄ-2017/72 պաշտոնական ընթացակարգի քննության համար էական նշանակություն ունեն հետևյալ փաստերը՝

1. ՀՀ արդարադատության նախարարության քրեակատարողական վարչության կարիքների համար կազմակերպվել է «ՀՀ ԱՆ ՔԿՎ-ԳՀԱՊՁԲ-17/13» ծածկագրով գնանշման հարցման ընթացակարգ (այսուհետ՝ Ընթացակարգ), որին մասնակցելու նպատակով «Էքսպորտ օյլ» ՍՊԸ-ն 25.09.2017թ. հայտ է ներկայացրել:

2. «Էքսպորտ օյլ» ՍՊԸ-ն Ընթացակարգի մասնակցության հայտի թիվ 2 հավելվածով հայտնել և հավաստել է, որ «Էքսպորտ օյլ» ՍՊԸ-ն բավարարում է Ընթացակարգի հրավերով սահմանված մասնակցության իրավունքի պահանջներին:

3. «Էքսպորտ օյլ» ՍՊԸ-ն «ՀՀ ԱՆ ՔԿՎ-ԳՀԱՊՁԲ-17/13» ծածկագրով ընթացակարգի 1-ին չափաբաժնին մասնակցելու նպատակով հայտի N 5 հավելվածով ներկայացրել է գնային առաջարկ, որի ընդհանուր գինը կազմել է 1 125 000 ՀՀ դրամ:

4. Պատվիրատուն ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետով (այսուհետ՝ Կարգ) սահմանված կարգով 02.10.2017թ. հարցում է ներկայացրել ՀՀ ԿԱ պետական եկամուտների կոմիտե՝ առաջին տեղն. զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց

պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ:

5. ՀՀ ԿԱ պատական եկամուտների կոմիտեի կողմից 10.10.2017թ. տրամադրված եզրակացության համաձայն՝ «Էքսպորտ օյլ» ՍՊԸ-ն (հայտը ներկայացնելու օրվա դրությամբ) ունեցել է ժամկետանց հարկային պարտավորություն՝ 100 000 ՀՀ դրամի չափով:

6. Ընթացակարգի գնահատող հանձնաժողովը՝ հիմք ընդունելով ՀՀ ԿԱ պետական եկամուտների կոմիտեի կողմից տրամադրված եզրակացությունը, 17.10.2017թ. ժամը 10:00-ի նիստի թիվ 4 արձանագրությամբ կայացրած որոշումով Ընթացակարգի 1-ին չափաբաժնի մասով մերժել է «Էքսպորտ օյլ» ՍՊԸ-ի հայտը:

## **5. Խորհրդի հիմնավորումները և եզրահանգումը**

Խորհուրդն, ուսումնասիրելով ՀՀ ֆինանսների նախարարության 02.11.2017թ. թիվ 03/26-3/19942-17 գրությունը, ՀՀ արդարադատության նախարարության քրեակատարողական վարչության 31.10.2017թ. թիվ 40/11-503 գրությունը՝ կից փաստաթղթերով, հայտնում է հետևյալը.

«Գնումների մասին» ՀՀ օրենքի (այսուհետ՝ Օրենք) 2-րդ հոդվածի 1-ին մասի 23-րդ կետի համաձայն՝ գնման գործընթացը գնում կատարելու նպատակով գնումների մասին Հայաստանի Հանրապետության օրենսդրությամբ նախատեսված ընթացակարգերի, իրավունքների և պարտականությունների իրագործմանն ուղղված գործողությունների ամբողջությունն է, ներառյալ՝ գնումների պլանավորումը, գնման առարկայի բնութագրի հաստատումը, պայմանագրի կատարումը և կառավարումը:

Օրենքի 6-րդ հոդվածի 1-ին մասի 2-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, **գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև**

**մեկ տրոկոսը, բայց ոչ ավելի, քան հիստուն հազար Հայաստանի Հանրապետության դրամը գերազանցող ժամկետանց պարտավորություններ:**

Նույն մասի 6-րդ կետը սահմանում է, որ մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը պաշտոնական ընթացակարգ է նախաձեռնում գնումների բողոքարկման խորհրդում՝ առանց վճարի: Տվյալ մասնակցի կարծիքը լսելուց հետո գնումների բողոքարկման խորհուրդը որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 28-րդ հոդվածի 2-րդ մասի 1-ին կետի համաձայն՝ հրավերում նախատեսվում է նաև, որ մասնակիցը՝

1) գնումներին մասնակցելու իր իրավունքը և հրավերով նախատեսված որակավորման չափանիշներին համապատասխանությունը հիմնավորելու համար հայտով ներկայացնում է իր հաստատած հայտարարությունը, պայմանով, որ մասնակիցը պարտավորվում է սույն օրենքով նախատեսված դեպքերում և կարգով ներկայացնել հայտարարությունը հիմնավորող՝ հրավերով նախատեսված փաստաթղթերը (տեղեկությունները):

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

Օրենքի 50-րդ հոդվածի 7-րդ մասի 2-րդ կետի համաձայն՝ ՀՀ գնումների բողոքարկման խորհուրդը որոշում է կայացնում մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու մասին:

Կարգի 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարը՝ էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Կարգի 44-րդ կետի համաձայն՝ Կոմիտեն սույն կարգի 43-րդ կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով տրամադրում է հարցման մասին տեղեկատվություն: Սույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից: Սույն կետով նախատեսված

որակավորման չափանիշի գնահատման ժամանակ հաշվի է առնվում սույն կարգի 47-րդ կետով նախատեսված ընթացակարգը:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում գրավոր տրամադրում է գնումների բողոքարկման խրոհորդին: Սույն կարգի 44-րդ կետով սահմանված՝ մասնակցության իրավունք չունենալու հիմքերի առկայության դեպքում սույն կետով նախատեսված տվյալները չեն ներկայացվում լիազորված մարմին, եթե մասնակիցը կամ կոմիտեն լրացուցիչ տեղեկատվությունը ներկայացրել է մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը:

Գնումների մասին ՀՀ օրենսդրության մեջ տարաբնույթ ընկալվող դրույթների վերաբերյալ ՀՀ ֆինանսների նախարարի 09.10.2017թ. թիվ Պ-2 պաշտոնական պարզաբանման համաձայն՝ եթե Կոմիտեի կողմից տրամադրված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է Օրենքով նախատեսված շեմը գերազանցող ժամկետանց պարտավորություններ և մասնակիցը կամ Կոմիտեն լրացուցիչ տեղեկատվությունը պատվիրատուին չի ներկայացրել մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը, ապա անկախ նշված ժամկետից հետո մասնակցի կամ Կոմիտեի կողմից լրացուցիչ տեղեկատվություն ներկայացնելու հանգամանքից, պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազոր մարմին:

Ընդ որում այս դեպքում, նկատի ունենալով, որ մասնակիցը հայտով ներկայացնում է հայտարարություն հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով Օրենքով նախատեսված շեմը գերազանցող ժամկետանց պարտավորություններ չունենալու վերաբերյալ, սակայն **Կոմիտեի կողմից տրամադրված տեղեկատվությամբ արձանագրվում է ժամկետանց պարտավորությունների առկայությունը, ուստի այդ հանգամանքը դիտարկվում է որպես մասնակցի կողմից**

**գնման գործընթացի շրջանակում ստանձնած պարտավորության խախտում, որի արդյունքում դադարեցվում է այդ մասնակցի հետագա մասնակցությունը գնման գործընթացին և մասնակիցը ներառվում է ցուցակում:**

Այսպիսով, ՀՀ արդարադատության նախարարության քրեակատարողական վարչության կարիքների համար կազմակերպվել է «ՀՀ ԱՆ ՔԿՎ-ԳՀԱՊՁԲ-17/13» ծածկագրով գնանշման հարցման ընթացակարգ, որին մասնակցելու նպատակով «Էքսպորտ օյլ» ՍՊԸ-ն 25.09.2017թ. հայտ է ներկայացրել:

«Էքսպորտ օյլ» ՍՊԸ-ն Ընթացակարգի մասնակցության հայտի թիվ 2 հավելվածով հայտնել և հավաստել է, որ «Էքսպորտ օյլ» ՍՊԸ-ն բավարարում է Ընթացակարգի հրավերով սահմանված մասնակցության իրավունքի պահանջներին:

«Էքսպորտ օյլ» ՍՊԸ-ն «ՀՀ ԱՆ ՔԿՎ-ԳՀԱՊՁԲ-17/13» ծածկագրով ընթացակարգի 1-ին չափաբաժնին մասնակցելու նպատակով հայտի N 5 հավելվածով ներկայացրել է **գնային առաջարկ, որի ընդհանուր գինը կազմել է 1 125 000 ՀՀ դրամ:**

Պատվիրատուն ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետով սահմանված կարգով 02.10.2017թ. հարցում է ներկայացրել ՀՀ ԿԱ պատական եկամուտների կոմիտե՝ առաջին տեղն. զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ:

ՀՀ ԿԱ պատական եկամուտների կոմիտեի՝ կողմից 10.10.2017թ. տրամադրված եզրակացության համաձայն՝ **«Էքսպորտ օյլ» ՍՊԸ-ն (հայտը ներկայացնելու օրվա դրությամբ) ունեցել է ժամկետանց հարկային պարտավորություն՝ 100 000 ՀՀ դրամի չափով:**

Ընթացակարգի գնահատող հանձնաժողովը՝ հիմք ընդունելով ՀՀ ԿԱ պետական եկամուտների կոմիտեի կողմից տրամադրված եզրակացությունը, 17.10.2017թ. ժամը 10:00-ի նիստի թիվ 4 արձանագրությամբ կայացրած որոշումով Ընթացակարգի 1-ին չափաբաժնի մասով մերժել է «Էքսպորտ օյլ» ՍՊԸ-ի հայտը:

Խորհուրդն արձանագրում է, որ «Էքսպորտ օյլ» ՍՊԸ-ն Խորհրդին է ներկայացրել ՀՀ կառավարությանն առընթեր պետական եկամուտների կոմիտեի հարկ վճարողների սպասարկման վարչության թիվ 20 բաժնի թիվ 1961 գրությունը, համաձայն որի 25.09.2017թ. դրությամբ ըստ ՀՀ ԿԱ ՊԵԿ տեղեկատվական բազայում առկա տվյալների Ընկերությունն ունեցել է ընդամենը 2 010 736 ՀՀ դրամ պարտավորություն (ապառք - 1 900 428, տույժ - 15 236 և տուգանք 5% - 95 072) ներմուծման ԱԱՀ-ի գծով և 667 278 ՀՀ դրամ գերավճար (դեբետային մնացորդ): Ներմուծման ԱԱՀ-ի պարտավորությունն առաջացել է 10.10.2017 թվականին Ընկերության կողմից էլեկտրոնային եղանակով ուղարկված 2017թ. օգոստոս ամսվա ներմուծման հարկային հայտարարագրի հիման վրա, որի ներկայացման և վճարման ժամկետն էր 20.09.2017թ.-ը:

Միաժամանակ վերոհիշյալ գրությամբ ՊԵԿ-ի հարկ վճարողների սպասարկման վարչությունը հայտնել է, որ Ընկերությունը 16.11.2017թ. դրությամբ ունի ընդամենը 723 441 ՀՀ դրամ (դեբետային մնացորդ) և 42 733 ՀՀ դրամ սոցիալական վճարի (ամսական) գծով գերավճար:

**«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե՝**

**ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:**

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Ելնելով վերոգրյալից և հիմք ընդունելով Գնումների մասին ՀՀ օրենսդրության մեջ տարաբնույթ ընկալվող դրույթների վերաբերյալ ՀՀ ֆինանսների նախարարի 09.10.2017թ. թիվ Պ-2 պաշտոնական պարզաբանումը՝ Օրենքի 6-րդ հոդվածի 1-ին մասի 6-րդ կետի «ա» պարբերության վերաբերյալ, Խորհուրդը գտնում է, որ «Էքսպորտ օյլ» ՍՊԸ-ի կողմից հայտի N 2 հավելվածով ներկայացված հայտարարությունը՝ մասնակցության իրավունքի

պահանջներին համապատասխանելու մասով, հանդիսանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի խախտում, քանի որ վերջինիս հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունը գերազանցում է ներկայացրած գնային առաջարկի մինչև մեկ տոկոսը:

Օրենքի 6-րդ հոդվածի 2-րդ մասի համաձայն՝ անձը գնումների գործընթացին մասնակցելու իրավունք չունեցող մասնակիցների ցուցակում ընդգրկվում է երկու տարի ժամկետով:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝ ՀՀ գնումների բողոքարկման խորհուրդը

### Ո Ր Ո Շ Ե Ց

ՀՀ ֆինանսների նախարարության 02.11.2017թ. թիվ 03/26-3/19942-17 գրությամբ «Էքսպորտ օյլ» ՍՊԸ-ին (ՀՎՀՀ՝ 01830529) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգը բավարարել և «Էքսպորտ օյլ» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված երկու տարի ժամկետով:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

ՀՀ գնումների բողոքարկման  
խորհրդի անդամ՝



ՄՀԵՐ ԱՆԱՆՅԱՆ